

জেএসসি পরীক্ষা বন্ধ চেয়ে হাইকোর্টে রিট

নিজস্ব প্রতিবেদক >

জুনিয়র স্কুল সার্টিফিকেট (জেএসসি) পরীক্ষা বন্ধের নির্দেশনা চেয়ে হাইকোর্টে রিট আবেদন করেছেন সুপ্রিম কোর্টের আইনজীবী ড. মো. ইউনুছ আলী আকন্দ। গতকাল বুধবার হাইকোর্টের সংশ্লিষ্ট শাখায় তিনি আবেদন দাখিল করেন।

আদালত সূত্র জানিয়েছে, রিট আবেদনে জেএসসি পরীক্ষাকে পাবলিক পরীক্ষা হিসেবে নেওয়ার সিদ্ধান্তকে অবৈধ ঘোষণার নির্দেশনা চাওয়া হয়েছে। অন্তর্বর্তী নির্দেশনার পাশাপাশি রুল জারির আবেদনও করা হয়েছে। এ রূপের শুনানি না হওয়া পর্যন্ত ২০১৬ সাল থেকে জেএসসি পরীক্ষা পাবলিক পরীক্ষা হিসেবে না নেওয়ার নির্দেশনা চাওয়া হয় আবেদনে। রিট আবেদনে শিক্ষাসচিব, প্রাথমিক ও গণশিক্ষা সচিব, মাধ্যমিক ও উচ্চ মাধ্যমিক শিক্ষা বোর্ডের সুব চেয়ারম্যান এবং মাদ্রাসা ও কারিগরি শিক্ষা বোর্ডের চেয়ারম্যানকে বিবাদী করা হয়েছে।

আবেদনে বলা হয়, মাধ্যমিক ও উচ্চ মাধ্যমিক শিক্ষা অধ্যাদেশ-১৯৬১ অনুযায়ী সব শিক্ষা বোর্ডের এসএসসি/এইচএসসি এবং সমমানের পরীক্ষা পাবলিক পরীক্ষা হিসেবে অনুষ্ঠিত হয়ে আসছে। ১৯৭১ সালের পর থেকে এ পর্যন্ত ওই আইনে জেএসসি পরীক্ষা বলতে কিছু নেই। এ ছাড়া বিশ্বের বিভিন্ন দেশে 'ও লেভেল' এবং 'এ লেভেল' পরীক্ষা পাবলিক পরীক্ষা হিসেবে অনুষ্ঠিত হয়। এর নিচের কোনো পরীক্ষাই পাবলিক পরীক্ষা হিসেবে গ্রহণ করা হয় না। তাই জেএসসি পরীক্ষা নেওয়ার সিদ্ধান্ত সংবিধানের সঙ্গে সাংঘর্ষিক।